


ASÚNTU NE'EBÉ PRESIZA TAU ATENSAUN IHA FULAN JULLU NO AGUSTU 2013

- ▶ Juventude ho violénsia (30)
- ▶ Impaktu alkol/tua iha violénsia (15)
- ▶ Disputa rai (8)
- ▶ Animál nain no to'os nain relata ho violénsia (4)

TOTÁL INSIDENTE NE'EBÉ RELATA KADA DISTRITU


Distritu	Insidente
Lautem	15
Covalima	6
Díli	25
Vikeke	9
Aileu	6
Ainaro	8
Ermera	4
Baucau	4
Manatuto	4
Manufahi	6
Oekusse	14
Likisá	3
Bobonaro	4
Totál	108

TOTÁL INSIDENTE NE'EBÉ REPORTA HUSI MAIU 2012 – AUGUST 2013



*Baseia ba analiza dadus hatudu katak insidente tun iha fulan
Juñu bele hetan sumariu insidente klaru liu iha*
www.belun.crowdmap.com

INSIDENTE FULAN JULLU NO AGUSTU 2013



JUVENTUDE LIGADU HO VIOLÉNSIA

Monitorizasaun insidente violénsia ba periode Julju –
Agustu 2013, hatudu insidente violénsia involve ou
pepetrador husi juventude hatudu 28% husi total relatóriu
insidente (30 sai husi 108). Iha Distritu Díli insidente
violénsia ralata ho juventude ho total insidente (13).
Distritu seluk juventu relata ho violénsia hanesan:
Manufahi (3), Vikeke (3), Lautem (2), Covalima (2),
Bobonaro (2), Baucau (2), Ermera (1) no Oekusse (1). Iha
grupu joven mane ida ne'ebé hakbesik ba kios nain iha
Fatuhada (subdistritu Dom Aleixo) halo ameasa verbál ba
kios nain atu fo'ou ba sira tua no sigaru. Maibé, tanba kios
nain ne'e la fo'ou ba sira, saida mak sira husu nune'e sira uza
tudik hodi sona kios nain mane ne'e to'ou kanek iha kabun.
Hafoin insidente refere rezolve kedas ho dalan família nian.
Insidente sona ema nu'udar lalaok krime ne'ebé
juridikamente presiza submete ba prosesu julgamentu hodi
hetan sentensa/pena ba autor ne'ebé komete violénsia.
Maske nune'e, realidade hatudu katak insidente krime mós
rezolve liu husi dalan família nian tanba ne'e autor violéntu
sei fo'ou deit osan ka buat seluk ne'ebé taka ninia lalaok

krime refere. Mekanizmu rezolve insidente ne'e konsidera hanesan meius ba minimiza fali Lei ninia kbi'it no hanesan mós meius ida ne'ebé fornese oportunidade ba insidente tuir mai ka insidente seluk.

KONSUMA ALKOL / TUA LIGA BA KONFLITU

Tuir dadus ne'ebé monitor Belun sira hetan iha fulan Jullu no Agustu 2013 hatudu katak insidente ne'ebé relasiona ho alkohol/tua hamutuk (11) insidente. Hanesan akontese iha distritu Dili (3), Oekusi (2), Lautem (3), Manufahi (2), Covalima (1). Hanesan akontese iha distritu Oekusi tanba hemu tua lanu Konselu Lia Nain baku eis xefi aldeia. Lalaok ne'e laos atitude éxemplar ida ba comunidade tanba ema ne'ebé komete violénsia ne'e lider lokál. Peskiza husi Belun 2010 konaba **Alkohol Ligadu ho Konfliktu ne'e** hatudu katak iha sosial seremonia ema uza alkohol bele mósu violénsia no sai eskalasaun violénsia no existe tensaun no labele rezolve problema. Maske Artigu 10 iha Dekretu Lei No. 8/2008 (Ata Taxa no Impostu) iha Timor Leste fo infomasaun spesifik ba taxa importansaun nomós taxa atu faan alkohol mak 2.5% maibe alkohol ne'ebé produs iha rai laran la iha regras hanesan tuir Dekretu Lei ida ne'e.

DISPUTA RAI / HADAU MALU RAI LIGA HO VIOLÉNSIA

Totál disputa rai iha relatoriu ne'e hanesan distritu: Dili (1), Covalima (2), Likisá (1), Bobonaro (1), Aileu (1), Lautem (1), Ainaro (1), Insidente ne'ebé ligadu ho hadau malu rai barak liu mak envolve membru familia, viziñu, kompañia ho kumunidade sira la simu atu kompañia mai halo edifisiu STAE, tanba tesi ai horis no sein fo koñesementu ba kumunidade, hodi nune'e kumunidade duni komphania hodi la bele halo konstruksaun iha ne'e, sira hakarak lori kazu ne'e ba rezolve tuir dalan mediasaun /dialogu. Potensial ba konfliktu konaba diputa rai, fo atensaun ba estatuta rai nian ligadu ho prosesu lei ba rai ne'ebé ema seidak hatene diak. Iha Jullu, aldeia Mauboc (suku Fatisi, subdistritu Lulara) ho aldeia Faulara (suku Selo Craik, subdistritu Aileu), insidente konaba baliza rai entre aldeia, no mósu insulta malu no ameasa malu. Lider kumunidade seidak rezolve. Liu husi programa Mediasaun Rezolusaun Disputa (MRD), sei fasilita prosesu mediasaun ba rezolusaun konfliktu, bainhira hetan aprosimasaun no prontu husi kumunidade.

VIOLÉNSIA RELASIONA HO ANIMÁL TAMA TO'OS

Monitorizasaun husi Jullu-Agustu relatóriu totál (4): distritu Lautem insidente entre animál nain no to'os nain hamutuk insidente (2); Vikeke (1), Oekusi (1). Insidente akontese tanba animál sira hanesan karau, kuda, bibi no fahi la sulan iha luhan ka la kesi ho talin. Tanba ne'e, mak animál fásil tama ema ninia to'os no estraga aihoris sira no

aihan sira iha to'os laran. Insidente ne'e hamósu violénsia sira hanesan; baku malu, sona malu, insulta malu no ameasa malu entre animál nain no to'os nain. Ezmplu: iha Jullu iha aldeia Cailaque (suku Afaloikai, subdistritu Uatu-Lari, distritu Vikeke), to'os nain ta'a animál nain nia liman kanek, tanba animál nain nia karau tama ba to'os nain nia to'os han hotu ai horis.

INSIDENTE SELUK IHA FULAN JULLU – AGUSTU 2013

Insidente entre estudante: Iha fulan Jullu no Agustu relatoriu totál insidente (6): Vikeke (3); Lautem (1); Aileu (1). Kazu husi konfliktu tanba diferenzia arte marsiais, insidente entre estudante mane tanba hadau malu namora, insidente tanba diferenza suku.

Insidente ligadu ho Grupu Arte Marsial: Iha Jullu insidente ne'ebé ligadu ho grupu arte marsial mak hanesan akontese iha subdistritu Baucau. Grupu joven ne'ebé kompostu husi membru ba arte marsial Kera Sakti, halo asalta fiziku no tuda kumunidade suku Gariuai ninia uma lima a'at no kareta ida vidru rahun wainhira grupu refere lori mate isin ne'ebé mate iha malang, Indonézia, (membru grupu Arte marsial) husi Dili ba Baucau. Grupu Kera Sakti hala'o asalta fiziku ba kumunidade Gariuai tanba diferenza arte marsial. No sira konsidera katak kumunidade Gariuai sai hanesan knu'uk ba grupu arte marsial PSHT tanba ne'e mak sira halao asalta fiziku ba kumunidade refere. Sorin seluk, kumunidade Gariuai ne'ebé la hatene tanba sa sira hetan asalta fiziku ne'e halo mós reazen hodi hasoru grupu ne'ebé asalta sira ho lori rama hana grupu Kera Sakti ida kanek iha kanotak. Insidente ne'e akontese no iha vitima maibe parte Polisia seidak konsege kaptura suspeitu ruma ba insidente refere. Nune'e iha possibilidade bo'ot ba futuro katak insidente seluk ne'ebé envolve grupu arte marsial sei nafatin akontese tanba seidak iha kapturasaun ba suspeitu ka autor sira husi insidente refere. Relasiona ho insidente refere halo kontribuisaun ba Governu hodi halo deizaun ba taka permanete actividades arte marsiais 3 hanesan (PSHT, Kera Sakti no KORKA). Insidente ne'e identifika kontenua provoka insidente violénsia bazeia ba grupu entre grupu ka grupu konfliktu. Kontra Rezolusaun Governu no. 16/2013 terminasaun iha grupu arte marsiais hapara iha dia 10 de Jullu 2013. Iha Dili mós envolve grupu arte marsiais (1).

Asaun violénsia husi ema deskoñesidu: Monitorizasaun husi relatóriu Jullu – Augustu 2013, asaun violénsia husi ema deskoñesidu. Insidente violénsia husi ema deskoñesidu akontese iha distritu sira hanesan; Iha Jullu iha suku Fatuhada (subdistritu Dom Alexio, distritu Dili); ema deskoñesidu ida oho mate ema estrangeiru husi Indonézia ida no sona kanek ema estrangeiru nain rua husi xineja iha loza ida iha Fatuhada. Polisia seidak kaptura ema deskoñesidu refere tanba depois hamate ema estrangeiru nain ida no hakanek ema nain rua ema deskoñesidu ne'e halai lakon husi fatin akontesimentu. Insidente ne'e kauza

ba sentimentu paniku no trauma husi komundade tanba seidauk iha kapturasaun ba suspeitu ne'ebé deskoñesidu hela. Iha mós insidente Polísia identifika ema deskoñesidu akontese iha distritu Likisá (1); Oekusse (1).

Insidente du'un malu buan/majiku: Iha Agustu, iha aldeia Fahilacor (suku Uma Naruk, subdistritu Laçlo). Insidente akontese professora ida nia oan mate tanba moras, maibé, profesor ne'e du'un fali ba professor mane seluk, mak halo nia oan mate. Insidente halo sira estori malu, no profesor hato'o keisa ba Polísia no Polísia refere ba rezolve husi Adat.

Debe osan/tusan ligadu ho violénsia: Insidente akontese iha aldeia Leogol (suku Zulo, subdistritu Zumalai, distritu Covalima), tanba debe osan, mane kios nain ba sisi nia osan iha mane seluk ne'ebé debe, depois mane ne'e dehan nia la debe osan, mane kios nain hirus no trata nia, mane kios nain fila ba uma, depois mane ne'ebé debe osan hemu tua lanu ba mane kios nain nia uma, trata no lori katana sona mane ne'e nia ulun. Kios nain ne'e hato'o keisa ba polísia hodi halo kapturasaun ba mane ne'e, no prosesu kazu iha ona Ministériu Públiku, no relasaun entre família la diak. Insidente seluk ligadu ho debe osan akontese iha Lautem (1), Ainaro (2).

PNTL uza forsa liga ho atuaun violénsia: Insidente ne'ebé akontese iha Jullu no Agustu 2013, iha aldeia Atres (suku Talimoro, subdistritu Ermera), insidente akontese envolve mós oknum Polísia sira ne'ebé ba halo atuaun ba pessoa ne'ebé komete iha asaun violénsia, ho hatudu lalaok violénsia hanesan akontese iha distritu Ermera, insidente oknum Polísia baku no kaptura joven ida ne'ebé deskonfia prátika loke treinu arte marsial PSHT iha suku Fatubolu (subdistritu Hatolia, distritu Ermera). Akontesimentu ne'e tanba Polísia buka joven mane refere kleur ona nune'e wainhira hetan joven ne'e oknum Polísia ne'e baku kedas joven ne'e. Joven ne'e kaptura tanba la kumpre rezolusaun governu nian ne'ebé hateten katak taka ona atividade tomak arte marsial nian hanesan Kera Sakti, PSHT no KORKA. Insidente hanesan mós iha distritu Dili Polísia baku joven mane ida tanba la uza kapasete, no iha distritu Lautem Polísia baku joven ida.

F-FDTL liga ho violénsia: Insidente F-FDTL ne'ebé ligadu ho oknum F-FDTL akontese iha distritu Bobonaro. Wainhira oknum F-FDTL ne'e sae motor la uza kapasete no kontra Sinál tranzitu tanba ne'e hetan hasé husi Komandante PNTL distritu. Maibé, tanba oknum F-FDTL ne'e la kumpri Komandante PNTL ne'e ba muda tiha motor no hasai xave motor nian. Oknum F-FDTL ne'e koalial hatan ba Komandante PNTL ne'e katak nia forsa nune'e laiha ema ida mak manda nian. Oknum F-FDTL ne'e mós halo asalta fiziku ba Komandante PNTL ne'e no iha tempu hanesan mósu tan Komandante operasionál PNTL Maliana, atu apoiu Komandanten Distritu no joven sira ne'ebé mak tur besik Estrada ninin mós halai mai apoiu Komandante PNTL nee

hodi duni oknum F-FDTL ne'e. Oknum F-FDTL ne'e halai no kontaktu ba postu F-FDTL iha Nunura, hodi ninia maluk sira to'o iha fatin insidente no konsege rezolve insidente refere liu husi dalan husu deskulpa ba malu. Insidente ligadu F-FDTL ho violénsia akontese mós iha distritu sira hanesan distritu Ermera oknum F-FDTL mane ida baku malu ho joven mane ida iha Merkadu Gleno.

ATIVIDADE PREVENSAUN KONFLITU NO RESPONDE BA KONFLITU

Atividade iha nivel subdistritu: Iha fulan Jullu liu husi Belun nia programa DAME liu husi parseriu ho Search for Common Ground (SFCG) hala'o diskusaun grupu liu husi asesmentu ba Rede Prenesaun no Responde Konfliktu (RPRK) iha subdistritu 43 remata. Husi rezultadu ne'e sei oferese treinamentu kapasitasaun ba RPRK.

Iha fulan Agustu liuhusi programa DAME hala'o sosialisasaun ba fundus ki'ik (Conflict Sensitive Development Inisiatives/Inisiativu dezenvolve sensibilidade ba konfliktu ba RPRK tuir faze ba faze.

Atividade Open Space: 'Juventude nia kontribuisaun ba hari'i Pás, Unidade, no ba Dezenvolvimentu'

Atividade hala'o iha salaun Madre Kanosa Bekora data 27-28/08/2013. Atividade Open Space ne'e hetan partisipasaun husi juventude distritu 5 no mós estrutura Rede Prevenasaun no Responde ba Konfliktu (RPRK) ho monitor husi distritu Ermera, Baucau, Manatuto, Likisá no Aileu.



Sekretáriu Estadu SEFOPE, Ilidio Ximenes, halo diskursu iha atividade Open Space iha Becora ba partisipantis sira.

Orador sira mak hanesan; Sekretáriu Estadu Formasaun Profesionál no Empregu (SEFOPE), representante husi Sekretáriu Estadu Juventude no Desportu (SEJD). No mós hetan partisipasaun husi Prezidenti Conselho Juventude Nasionál Timor Leste (CNJTL). Diskursu badak no loke ofisialmente atividade open space husi Sekretáriu Estadu SEFOPE. Sekretáriu ne'e hatete ba partisipantis sira ho lian

nune'e "oportunidade ba foin sa'e sira oras ne'e barak tebes, joven ne'ebé iha ona esperiénsia, bele loke kampu traballu ba aan rasik no mós bele emprega ema seluk".

REKOMENDASAUN

Sekretáriu Estadu Juventude no Desportu

- ▶ Loke sentru treinamentu vokasionál iha distritu sira atu joven sira iha distritu bele asesu ba hetan oportunidade ba aumenta sira nia koñesimentu hodi bele asesu ba serbisu.

Ministru Komérsiu Industria no Ambiente

- ▶ Haforsa lejislasaun no regulamentu sira kona ba tua importaun taxa no mós tua lokál sira ne'ebé fan, ba limita ba tinan (18+) ba leten mak bele hola.
- ▶ Fo korajem no partisipa hodi fasilita comunidade liu husi tradisionál Tara Bandu atu prevene ema labele hamósu violénsia ba malu kauza husi animál tama to'os.

Sekretáriu Estadu Seguransa

- ▶ Hasae kapasidade funksionál no atendimentu ba membrus PNTL sira iha terenu atu bele sai profesionál liu tan no eleva Lei ho Órden no respeita direitus umanu iha sira ninia serbisu.
- ▶ Kria transparensia no asaun disiplinár ba oknum Polísia ne'ebé hamósu atus violénsia ka krime atu bele hamósu konfiansa husi povu ba insituitisaun Polísia.
- ▶ Polísia presiza hamósu atividade amigável ho comunidade sira atu bele iha intimidade ba relasaun sosiál no hamenus insidente sira entre Polísia ho comunidade no partikularmente hamósu relasaun diak entre Polísia ho juventude sira.

Sekretáriu Estadu Defeza

- ▶ Hasae abilidade funksionál no étika profisaun atu FFDTL sira ne'ebé postulizadu iha postu sira Profesionál liu tan no iha abilidade interasaun sosiál ne'ebé diak entre instituisaun seluk no comunidade ein jerál.
- ▶ Haforsa regulamentu sira kona ba asaun disiplinár membru F-FDTL ne'ebé komete asaun violénsia ka asaun krime sira.

Sekretáriu Estadu Asúntu Terras e Propriedade

- ▶ Presiza hala'o sosializasaun kona ba estatuta rai, prosesu legál sai nain ba rai, lei sobre estatuta rai okupa no prosedimentu legál seluk ne'ebé relasiona ho rai atu hamenus insidente ho motivu hadau malu rai no baliza iha Timor laran.

Ministériu Saúde/Sosiedade sivil

- ▶ Konduta edukasaun saude no kampaña kona ba perigu no kauza husi konsumu tua ba saude isin nian no mental nian.

Lider distritu sira/ Sosiedade sivil

- ▶ Hala'o edukasaun sivika kona ba asaun non violénsia iha prosesu rezolve konfliktu sira entre comunidade, no halao mós sosializasaun kona ba Lei rai nian no assuntu ba comunidade sira.
- ▶ Hala'o Tara Bandu iha distritu idaidak iha distritu 13 atu bele hamenus no prevene insidente sira entre animál nain no to'os nain no mós atu reduz ema tesi ai estraga, sunu rai.

KONABA REVISTA SITUASAUN IHA NE'E

Karik presiza atu konfirma, kona ba kontiudu tomak revista situasaun fulan Jullu no Agustu 2013 ita boot sira bele kontaktu mai: Marília O. da Costa: Manajer programa AtReS via email bylah.belun@gmail.com ka via telemovel (+670 77276671). Pedro de Araújo dos Santos - Ofisiál Política Públiku. pedroa.belun@gmail.com Telemóvel (+670 77001421).